

QUÆSTIO MEDICA,

*Cardinaliis disputationibus manè discutienda in Scholis
Medicorum, die Jovis undecimâ Martii 1717.*



M. CLAUDIO DU CERF, Doctore Medico,
Præfide.

An senibus Mel?

I.

MAXIMA debetur senibus reverentiâ : Hi summâ ornatî prudentiâ, multarumque rerum experienciâ peritiores facti, sapientissimis suis Rempublicam juvant consiliis. Ad tuendam conservandamque senum sanitatem, sex rerum nonnaturalium usus plurimum confert ; si legitimus, animæ corporisque functiones ad constitutum usque vitæ terminum fœliciter, ut decet, absolvuntur : si improbus, morborum llias. Hominis vita ab ortu ad occasum perenni ad omnes partes succi nutritii (chyli videlicet ex alimentis & potubus mutuò fermentationis & tritûs commercio ritè confecti) applicatione fovetur ac sustinentur ; hoc dulci recreatæ succo, illarum structura, positus, concentus, tonus, elater, & oscillatio conservantur. Plantis & animalibus solûm vivere datum est. Vitæ cursus temperamenti mutatione seu ætatum vicissitudine distinguitur. Prima omnium infantia calidissima & humidissima ; suo sequuntur ordine pueritia, pubertas, adolescentia, constans suique matura ætas, & senectus cui universim lassæ, non fractæ ætatis nomen est ; hæc enim triplex, cruda seu viridis, ingravescens, & decrepita omnium frigidissima ac siccissima. Vis senex in suis diebus exultare & lætari, fac ut eo nutriantur alimento quo bona fœlixque succedat nutritio, uberior suppeditetur spirituum copia, intestinus progressivusque sanguinis motus promoveatur, solidisque sese movendi integra concedatur libertas.

II.

SENECTUS naturalis est principiorum seu partium essentialium liquidas solidasque partes componentium motûs imminutio. Quænam sint hæc principia quæris ? Attende : Sal, Sulphur, Mercurius, Aqua, & Terra, sunt vera ac genuina corporis humani & rerum omnium quas summus Opifex condidit principia ; quæ prout tenuia sunt seu volatilia, crassa seu fixa,

pro variis ætatibus diversa mixtio, moles, figura, situs, potestas, virtus, atque agendi ratio. In senectute omnia ferè evadunt fixa, lentescit sanguis, (quippe lentor sanguinis omnium morborum causa) acotem contrahit, in cineritiâ corticali glandulosâ cerebri cerebellique substantiâ pauci secer-nuntur spiritus: hinc in senibus vasorum remissio, elaterum inertia, segnis fermentatio, cutis rugis aspera, corporis macies, deleta ferè memoria, sterilis imaginatio; quin etiam plurimis infestantur morbis, nimirum spi-randi difficultate, fluxionibus cum tussi, urinæ stillicidiis & difficultatibus, articulorum doloribus, nephritide, vertigine, syderatione, cachexiâ, torius corporis pruritu, vigiliis, alvi, oculorum & narium humiditatibus, visûs hebetudine, glaucedine, auditûs gravitate. Eheu! quàm misera senum con-ditio! quot quantisque calamitatibus sunt obnoxii! ipsa enim senectus:

Expectata diu, votisque optata secundis

Obijcit innumeris corpus lacerabile morbis.

Ast ubi ad summum senectutis apicem pervenêre; functionum omnium cor-poris imminet ruina, ultima diès expectanda, cessanteque vitæ principio-rum motu, tandem vitam cum morte, quâ fit corporis ab animâ recessus, commutant.

III.

ΓEPOKOMIKH pars est *βιωνις* quæ senum vitæ & sanitati prospicit. Sa-nitas optimum vitæ suavioris condimentum, in functionum omnium in-tegritate posita est, quæ tandiù sui juris est, quantiù nullus in assumendis ali-mentis error committitur. Qui vult sanus fieri, certis legibus se obligare debet, intemperantiam medicorum nutricem fugiat, parè ac simpliciter vivere dis-cat, nec multiplici ciborum apparatu quo maxima pars hominum delectatur vitam sibi brevem efficiat, innumerisque morbis reddat obnoxiam. Ars nostra sapientibus naturæ legibus stabilita, certam victûs rationem cuilibet ætati & temperamento utilem esse ac necessariam nos edocet, ut stupenda cor-poris humani machina suis stet honoribus. Cùm autem liquida, spirituosa & solida corporis nostri substantia jugiter diffluet, alimentis opus est ad illius instaurationem. Alimentorum materia ex animalibus & vegetabilibus desumitur. Alimenta vel sunt solida, vel liquida: solida cibi, liquida potûs nomine donantur. Cibo fames, potu sitis sedantur: utriusque natura, quan-titas, qualitas, sumendi tempus, utentis ætas consideranda. Quodam, amabo, alimentum naturæ senum debili reficiendæ & erigendæ convenien-tius erit, quàm Mel, cui non spernendas inesse vires ad vitam sanitatemque conservandam, tùm autoritatibus, tùm exemplis confirmatur. Pythagoras (referente *Lærtio*) cùm frugalissimè viveret, solo sæpè melle contentus fuit, & ad annum nonagesimum vitam perduxit, affirmabatque eos sinè morbo vivere posse qui mel crebrò comederent. Pollio Romanus annum excedens centesimum cùm interrogaretur ab Augusto, quo vitæ regimine animi corporisque vigorem conservasset, intus melle, foris oleo, respondit. *Galenus*, Anthiocum cum pane & melle Attico vitam ad octuagesimum an-num protraxisse testatur, *Athenæus* Democritum jam mortis proximum, solo mellis odore & halitu vitam protogasse; & *Corsos* ideò esse longævos, quòd

Mel, cujus maxima copia ibi colligitur, eibus sit ipsis valdè familiatis; & sacri codicis testimonio declaratur mollis præstantia, ubi loquens de Joanne-Baptista: *Butyrum*, inquit, & *Mel comedet ut sciat reprobare malum & eligere bonum*. Mel igitur optimus senum cibus, boni succi, facilis coctionis, & distributionis. Hoc suavi mollique cibo in chylum converfo & singulis partibus didito, corpus solidis splendescit bonis, principes animæ functiones sua feliciter adimplent munia, vitæque demùm suis limitibus circumscripta nullis turbatur doloribus.

IV.

COELESTE donum pretiosissimumque hujusce vitæ munus Mel. An ab aëre tantùm hujus origo repetenda sit, & ab apibus in escam colligatur atque in favos transferatur; an ex plantarum iucco ab apibus generetur; an quæ collegerunt in hunc saporem mixturâ quâdam & proprietate spiritûs sui mutant; an conditurâ & dispositione in hanc qualitatem vertantur, quæ ex tenerimis virentium florentiumque decerperint, non sinè quodam fermento quo in unum diversâ coalescunt; quàm variæ, quàm discrepantes sententiæ? Mel apibus debetur. Hæ vagantur & flores ad Mel faciendum idoneos carpunt; deinde quidquid attulere, disponunt, ac per favos digerunt:

————— *Purissima mella*
Stipant & liquido distendunt nectare cellas.

Virgil. 4^o.
Georg. v. 160

Præterea tantus est apum labor in colligendis floribus ad Mellis productionem, ut ipsæ etiam mortem subire vereantur.

At fesse multâ referunt se nocte minores
Crura thymo plena: pascuntur & arbuta passim
Et glaucas salices, cassiamque, crocumque rubentem,
Et pinguem tiliam, & ferrugineos hyacinthos.
Sæpe etiam duris errando in cotibus alas
Attrivèrè, ultroque animum sub fasce dedèrè;
Tantus amor florum & generant li gloria Mellis!

Idem.
v. 180.

Idem
v. 205.

Verùm ex omni apum genere Mel colligendum esse ne existimes.

Namque alia turpes horrent —————
Elucent alia & fulgore coruscant
Ardentes auro, & paribus lita corpora guttis.
Hæc potior soboles, hinc cæli tempore certo
Dulcia mella premes.

v. 95 & 100.

Mellis differentiæ tùm ex plantis, tùm à natali solo repetendæ. Quod ex Absynthio apes colligunt, gustu amarum, è Rhododendro venenatâ pollet qualitate. Præcellit omnibus ubi Thymus, Lavendula, Rosmarinus aliæque plantæ aromaticæ luxuriant. Atticun & præcipuè ex Hymetto omnium præstantissimum, à Veteribus maxime laudatum. Nos verò Melli Narbonensi palmam concedimus, cujus frugiferæ dotes habitâ ratione ætatis consistentiæ, coloris, odoris, saporis, dignoscuntur. Sit ergo ætate recens, consistentiâ spissum,

colore album, olfactu suave, gustu jucundum. Mel sale acido essentiali particulisq; oleosis constat, quibus intinè sociatis, crassi, viscidi, tenacesque succi liquidis solidisque partibus hærentes, inciduntur, comminuantur, & per diversa corporis emunctoria, insensibilemque transpirationem foras amandantur. Ab hac succorum pravâ indole immunes erunt senes Mellis cibo assueti: eâ tamen conditione ut coquatur, non verò crudum nisi in minimâ quantitate assumatur. Ex eo saluberrimus paratur potus, Hydromel vulgò dictus, ab Antiquis verò Mulsâ, Melicratum, Apomeli, quo senum exhilaratur natura.

V.

Hipp. lib.
de affect.

QUEMADMODUM Lac universis puellulis competit, ita Mel senibus convenientissimum est. Divinum illud nectar in chylum faciliè convertitur ac undique distribuitur, & per arctissimas nervorum, membranarum, fibrarum, cartilaginum & ossium angustias penetrat. Efficacitatem principiorum ex quibus constat, expende: his omnibus robur, bonus habitus & pulchritudo senibus conciliantur. *Mel enim & nutrit, & bonum colorem exhibet*: quippe sale suo acido essentiali, particulisque oleosis, crassiores attenuantur succi, inertia idcirco senum principia majori pollent agendi virtute; spiritus ad cerebrum delati expeditiori cientur motu, fluxilior evadit sanguis, circuitus velocior motus, fibræ uberiori vividiorum particularum accessione ad oscillandum aptiores, musculorum motus validior, triturationum, secretionum, omniumque functionum adest instauratio; exquisitiores quoque fiunt nervorum operationes; vigent oculi, imaginatio, memoria, omnesque animæ actiones multò illustriores fiunt. Adde quod æquabili respiratione liber patebit æris in pulmones ingressus, placidi erunt somni, suaves vigilæ, jucundis senes afficiuntur animi pathematibus, ad risum & ad amorem erunt proclives. Insuper à vanâ climactericorum annorum, cometarum, astrorumque defectionum (quæ sunt imperitæ plebis terricula) perniciæ tuti sæciliè vivunt; rectèque spretis arcanis ex auro, gemmis, cervorum, serpentumque carnibus inani molitione concinnatis liquoribus, qui sunt stultæ credulitatis parvus, debitum vitæ longiori cursum absolvunt. Qui merum ut senii Pharmacum Melli anteponunt graviter hallucinantur. Merum senibus noxium; mentem & sensus confopit omnes, durum ex se, contumax & coctionis impatiens, debilem coquendi vim eludit, senesque præmaturè extinguit. Quid plura? Mellis usu vitam ducent senes nullis stipatam morbis, omnibus curis ærumnisque solutam. Quò si tandem eò venerit ætas, quò vel cunctantibus veniendum, quò satietas vitæ tempus maturum morti affert, tam placidè è vivis excedent, ut obdormire, non emori videantur.

Ergò senibus Mel.

Proponebat Parisiis CLAUDIUS DE LA VIGNE DE
FRECHEVILLE, Parisinus, Baccalaureus Medicus.
A. R. S. H. 1717. à sextâ ad meridiem.

Typis JACOBI QUILLAU, Universitatis & Facultatis Medicinæ
Typographi.